

02. 修行者拄著鬼

佇咧深山林內，有一間廟寺，廟寺內底有一間房間，聽人講這間房間內底有魔神仔，暗時定定會出來共人嚇驚，所以廟寺內底攏無人敢住。

有一工，一位修行者來到這間寺廟，伊共住持問講：敢會當掛單一暗？住持共伊入去彼間有魔神仔的房間，共伊講：「這間房間聽講有魔神仔躡佇遮，凡勢會予人不得安寧。」這個人靠勢家已修行足深，功夫誠厲害，未曾未就頓胸坎講大聲話：「只是一個小小的魔神仔爾爾，袂當共我按怎！我一定有法度對付伊。」這個修行者就按呢躡入去彼間房間。

暗頭仔，又閣有一位修行者想欲來借躡一暝，住持嘛予伊躡入去全彼間房間，嘛先共伊講凡勢會有魔神仔的代誌。這位修行者足靠穩，伊講：「我一定會當對付這個小鬼。」

全這咧時陣，彼个先到的修行者佇咧房間內，門窗關甲密閉閉，跔疊盤當咧打坐，那打坐那咧等魔神仔出現，猶毋過，伊一直無看著魔神仔的影，嘛無聽著魔神仔的聲。

無偌久，另外彼个修行者嘛來到這間房間，頭起先伊拚門，想欲入去。內底彼个人叫是外口拚門的是魔神仔，心內驚惶，無願意開門，這個後尾來的人足大力咧揀門，內面的人就閣較出力共門拄牢咧。

後來，外口的修行者氣力較大，就拚入去矣，內底的修行者掠做拚入的是魔神仔，就下性命共拍。想嘛知，拚門入來的修行者嘛認為內底的彼个是魔神仔，兩個人攏無看予詳細就舂舂做一丸。一直拍甲天光，日頭出來矣，認真共看予斟酌，原來是以前共修的道友，看對方的頭殼頂有幾若癩（luí），攏感覺誠歹勢，互相會失禮。

這個時陣，廟寺內底的師父，行來這間房間邊仔，知影狀況了後，看著這齣胡撇仔繼來起愛笑。

心無邪毋驚鬼，日時無做虧心事，暝來毋驚鬼來掠。故事當中這兩位修行者因為心內有鬼，毋知啥物情形就烏白拍，相拍當做跋感情，實在是真笑談。